

# QUÆSTIO MEDICA

Cardinalitiis disputationibus manè discutienda in Scholis Medicorum, die Jovis vigesima-septima Februarii.

M. CLAUDIO PERRAULT, Doctore Medico, Præsede.

*Est ne lac sanguis dealbatus?*

**L**AC nutritioni recens nati infantis natura sic adornat, ut quod in quovis alimento præcipuum est, non difficile præbeat ventriculo coquenti operam. Nec tamen quo melius id præstet, ideo vires omnes adhibet quibus ad humores coquendos instructa est: sed ut cuiusque aut nascentis aut nondum nati corpusculi varia fert indoles, ita majorem aut minorem curam impendit in præparatione ejus alimenti, quod cuique conveniens est. Nam credibile est illam quæ in ipsi vitæ primordiis sanguinem perfecte elaboratum fœtui puillo subministrat per proprios canales umbilico insertos, eam ipsam subinde liquorem non ita accuratum intra amnii tunicam effundere, jam grandiusculi ore attrahendum: tandem non absimilis genii succo sed minus adhuc defæcato mammas implere in editi & tunc vegetioris infantis alimoniam. Nempe sapiens illa omnium parens & educatrix cuiusque vires cum in fœtu, tum in infante pendens, præcipua & ardua opera rudibus ne committat, ea penè confecta tradere studet, utcumque tamen perficienda relinquit, ut longa tandem consuetudine partes tentata sæpius ea munera, quæ ipsa per sese nullo duce post partum edituræ sunt, edoceantur. ventriculum enim nullo tyrocinio informatum, & laborum suorum inscium verita ad opus vocare extemporaneum, ejus infantiam imprimis erudire satagit, inchoata in amnii succo, deinde in lacte sua pensa distribuendo, quæ chylosoos integræ, propria industria, demum à lacte depulso suscipiendæ, velut typum & exemplar exhibere, atque adeo partis illius inter principes non ultime, vim instam promovere valeant.

**N**IHIL ferè differt inter lac & chylum quam quod sanguinem junioris fœtus inter & materium, substantia, temperies, color, sapor, usus his ut illis penè similis: aliqua tantum præparatione ac levi coctione discrepant. Maternus sanguis fœtui destinatus sparsas per placenta carneam molem subit radices vasorum umbilici, quæ mesenterii vicem in fœtu novello peragunt, ut præparata ibi materia sanguini perficiendo subministraretur. Eodem modo nutriti chylus lacti conficiendo dicatur mesenterium, jecur, pulmones, cor & mammarum vasa pervadens, glandularum quæ appositæ sunt vi perficitur, & succus evadit infanti amicus, facili negotio in sanguinem mutandus. Sed quemadmodum fœtus junior matris sanguine vel optime elaborato non alitur, quin prius partium sanguinis opificum veluti domesticis focis admotum ipse proprium effecerit. Ita lacti omnibus chyli dotibus instructo coctionis tamen in lactentis ventriculo complementum quoddam accedat necesse est, ut peculiari chyli puerilis nota insignitum propriis sanguificationis organis acceptum esse possit.

**N**ON quis in vasis contentus humor sanguis est, pervias istas publicas non utilia tantum invehuntur alimenta, cæcùm quoque & fœdes exportantur. Ipse etiam partes alibiles non unius generis sunt. Quibusdam coctis jam & rubro sanguinis caractere notatis, aliæ crudæ & adhuc ex chylosi albescentes promiscuæ permiscuntur. Hæ nempe pulmonum folles & intestinos lebetes nondum expertæ, nondum in sanguinis officinis vero nutriti humoris sigillo obsignatæ, interim dum id consequantur, partium corporis quarundam imperfectarum spuria nutritione plerumque absumuntur, & in pinguedinem, pilos, ungues, cuticulam, brutis in cornua, caudam, atque jubas abeunt; ac si quibus mulieribus non lactantibus redundaverint, cephalalgia, catharri, sputationis, aliorumque affectuum causæ evadunt inedia potissimum rescindendæ. Fæmineum liquidum genus edax, jecoris & cordis calore imbecillo ventriculi coctione magis viger, ac vasa humore plurimo distendit, sanguine pauco, parciore vero dum utero gerit, quo tempore calor & spiritus circa uterum novis occupati ministeriis sanguinis opificum segnius perficiunt: tunc etiam mammarum convenientis materię opportunitate sui muneris admonentur, lac tamen non multum generant, & statim à partu pravum, ac tandem nullum; pro variâ aut ad uterum, aut ad mammas, aut ad cor caloris & spirituum conversione, nutritioni quippe potissimum nunc fœtus, nunc infantis, nunc matris per alternas vices incumbendum.

**C**HYLUS sanguinis & lactis communis materia est, sed non tanta chyli ad procreandum sanguinem facilitas quanta proclivitas est ad lactis coctionem. Sanguis ex chylo plurimo longa & operosa coctione in crassato non copiosius educitur, obliteratis pene omnibus quæ in cibis fuerant viribus: lac vero iis parum mutatis plurimum & statim fit ab imbecillo calore ex chylo dilutiore, de cibis qui in paucissimum & tarde sanguinem mutantur ut oleribus, præsertim lactuca, fabis, aque etiam poti liberaliore, tum ab otio atque edacitate. At contra quæcumque sanguinis citum moliantur opus mammas lacte non distendunt: mulieres quippe solida ac dura carne præditas, jusculis carniū, vino & exercitatione utentes, & quæ non sunt voraces, puri sanguinis cumulare magis, lactis minus suppeditare videas; quod licet optimum sit, copioso tamen & livefcenti, non semper anteponendum.

**S**APIENTIOR est natura quam ut aliquid frustra ex sententia molitur: nec vero necessarii opibus adeo superfluit ut earum citra noxam ferre possit temerariam profusionem. Scilicet operosam in sanguine conficiendo operam, calorem nativum ludere, & debitos substantiæ nobiliori conatus in deteriorem & minori molimine parabilem impendere nec decet, nec fieri potest ut sanguinis tanta copia lactantes singulis diebus minuantur, nullâ, ut contingit, virium jacturâ. At ductus desideras quibus chylus ad mammas deferatur: credo si canales per quos bilis infanientibus rapiatur in cerebrum, aut serum perveniat ad renes cum Democrito, Asclepiade & Heraclito adhuc investigas, si materiam nutriendis oculorum humoribus & siccioribus offium partibus variè destinata per ejusdem generis tubulos fluere posse nondum intelligis, & sola secretione ex diversis sed promiscuis humoribus singulos in singulas partes derivari, si non advertis quibus usibus tor & tam variæ per universum corpus sparæ glandulæ interserviant; si nescis spongiarum more laudabiles succos quasdam sorbere & effundere, alias sedam tergere illuviem, & quemadmodum in glandulis ventriculi, intestinorum, mesenterii, pancreatis, cutis, noxii humores per arterias errantes interceptiuntur, sudore, feces aut vomitu, ut in naturali & quotidiana, sic & in artificiosa expurgatione eliminandi. Ita & in amnio, in mammis, in pericardio, in ore, & in aliis partibus quasdam reperiri, quarum nonnullæ vix cadunt sub aspectum, & tamen per eas utiles & eximii liquores stillent. Omnino nisi sanguinem in serum, in sudorem aut in eos qui per catharsim educuntur humores mutari contendis: non est cur velis substantiam illam naturæ delicias atque decus generosos spiritus deponere & suâ purpurâ contumeliosius exui in lactis generatione.

*Ergo lac non est sanguis dealbatus.*

Proponebat Parisiis CLAUDIUS JOANNES-BAPTISTA DODART, Parisinus Baccalaureus Medicus. A. R. S. H. 1687.